

# NAFARROAKO Aldizkari Ofiziala

## DEIALDIA, FORUZAIN IZATEKO 17 LANPOSTU OPOSIZIO BIDEZ BETETZEKO

*2018ko 93. Nafarroako Aldizkari Ofizialaren separata, maiatzaren 16koa  
Akats zuzenketa. 2018ko 96. Nafarroako Aldizkari Ofiziala, maiatzaren 21ekoa*

**941/2018 EBAZPENA, apirilaren 23koa, Funtzio Publikoko zuzendari nagusiak emana, Nafarroako Foru Komunitateko Administrazioaren eta haren erakunde autonomoen zerbitzuko foruzain izateko 17 lanpostu oposizio bidez betetzeko deialdia onesten duena.**

Abenduaren 20ko 116/2017 Foru Dekretuaren bidez (244. Nafarroako Aldizkari Ofizialean argitaratua, abenduaren 22koan), Nafarroako Foru Komunitateko Administrazioaren eta haren erakunde autonomoen enplegu publikoaren 2017ko eskaintza onetsi zen. Bertan, besteak beste, foruzainen hamazazpi lanpostu huts ageri ziren, funtzionario araubidekoak eta C mailakoak.

Nafarroako Foruzaingoko lanpostuak betetzeko Erregelamendua onetsi duen martxoaren 25eko 57/2002 Foru Dekretuaren 10.2 artikuluan eta aplikatzekoak diren gainerako arauetan xedatutakoari jarraikiz, sartzen diren promozio berrien prestakuntza prozesuak bukatu aurretik, deialdia egingen da lanpostu hutsak lehiaketa bidez edo berriazko lehiaketa bidez betetzeko, lanpostu berdina duten funtzionarioen artean.

Hori hala izanik ere, kontuan harturik lanpostu horiek betetzea presakoa dela, 57/2002 Foru Dekretuan aurreikusitakoaren babesean, oposizio bidez sartzeko deialdi hau onesten da, foruzain lanpostuak betetzeko lehiaketaren edo berriazko lehiaketaren deialdiarekin batera, eta erabakitzen da Administrazioan sartzeko deialdi honetan beteko diren lanpostuak izanen direla deituta baina ebatzi gabe dagoen lehiaketaren edo berriazko lehiaketaren ondorioz bete gabe gelditzen direnak.

Horrenbestez, eta otsailaren 21eko 30/2005 Foru Dekretuaren bidez esleiturik ditudan eskudantziak erabiliz,

EBATZI DUT:

1. Nafarroako Foru Komunitateko Administrazioaren eta haren erakunde autonomoen zerbitzuko foruzain izateko 17 lanpostu oposizio bidez betetzeko deialdia eta dagozkion oinarriak onestea.
2. Nafarroako Aldizkari Ofizialean argitara dadila agintzea, behar diren ondorioak izan ditzan.



3. Ebazpen hau jakinaraztea Langileriaren Kudeaketako Zerbitzuari, Argibide eta Erregistro Bulegoari, Barneko zuzendari nagusiari, Foruzaingoko buruari eta izendatu diren epaimahaikideei, behar diren ondorioak izan ditzan.

Iruñean, 2018ko apirilaren 23an.–Funtzio Publikoko zuzendari nagusia, Amaia Goñi Lacabe.

## DEIALDIA, FORUZAIN IZATEKO 17 LANPOSTU OPOSIZIO BIDEZ BETETZEKO

Hona hemen deialdiaren

### OINARRIAK

#### **1.–Deialdiaren xedea.**

1.1. Deialdi honen xedea da Nafarroako Foru Komunitateko Administrazioaren eta haren erakunde autonomoen zerbitzuko foruzain izateko 17 lanpostu oposizio bidez betetzea. Lanpostuak funtzionarioen araubidekoak dira, C mailakoak eta Nafarroako Foruzaingoari atxikiak; zehazki, Barneko zuzendari nagusiaren apirilaren 16ko 98/2018 Ebazpenaren bidez deitutako lehiaketaren edo berariazko lehiaketaren ondorioz bete gabe gelditzen diren lanpostuak eskainiko dira. Lanpostu hutsak hautatzeko ekitaldia egin baino lehen zehaztuko dira haien plantilla-zenbakiak eta destinoak.

1.2. Hautapen prozedura hau ondoko arauak erregulatuko dute: Nafarroako Poliziei buruzko martxoaren 23ko 8/2007 Foru Legea; Nafarroako Polizia Kidegoetako Langileen Erregelamendua onesten duen abenduaren 29ko 718/2003 Foru Dekretua; Nafarroako Foruzaingoko Lanpostuak Betetzeko Erregelamendua onesten duen martxoaren 25eko 57/2002 Foru Dekretua; Nafarroako Administrazio Publikoen zerbitzuko Langileen Estatutuaren testuategina onesten duen abuztuaren 30eko 251/1993 Legegintzako Foru Dekretua; Nafarroako Administrazio Publikoetan Lanpostuak Betetzeko Erregelamendua onesten duen azaroaren 6ko 215/1985 Foru Dekretua; Nafarroako Foru Komunitateko Administrazioaren eta haren erakunde autonomoen organoetako langileen arloko eskudantziak zehazten dituen martxoaren 25eko 30/2005 Foru Dekretua; aplikatu beharreko gainerako arauak eta deialdiaren oinarriak.

#### **2.–Izangaiek bete beharreko baldintzak.**

2.1. Oposizio honetan onartuak izateko, izangaiek honako baldintza hauek bete beharko dituzte:

- a) Espainiako nazionalitatea izatea.
- b) 18 urte beteak izatea eta erretiroa nahitaez hartzeko ezarritako gehieneko adina ez izatea.
- c) Eskaerak aurkezteko epea amaitzen den egunean Batxilergoko titulua, Bigarren Mailako Lanbide Heziketakoa edo baliokidea izatea, edo eskuratzeko moduan egotea.

Tituluak atzerrian lortu badira, homologatuta daudela frogatzen duten frogagiriak eduki beharko dira.

d) Lanpostuak berezkoak dituen eginkizunak betetzeko behar diren gaitasun fisiko eta psikikoak izatea eta deialdiaren III. eranskinean agertzen diren arrazoi medikoengatik baztertzeko moduan ez egotea.

e) Dolozko delitu bat dela kausa kondenarik jasoa ez izatea eta administrazio publiko baten zerbitzutik baztertua ez izatea, eta ez egotea desgaitua edo gabetua eginkizun publikoetan aritzeko, deusetan galarazi gabe delituen aurrekariak ezereztea aplikatzea, zigor eta administrazio arloetako arauak jarraiz.

f) A2 eta B motako ibilgailuak gidatzeko baimenak izatea.

g) Aldean armak eramateko eta, behar denean, erabiltzeko konpromisoa. Eskatzailearen aitortzearen bidez adieraziko da konpromiso hori.

2.2. Euskarako B2 edo C1 jakite-maila edukitzeko betebeharra duen lanpostu elebidun bat eskuratu nahi izanez gero, Hizkuntzen Europako Erreferentzia Esparru Bateratuaren arabera kasuan kasuko maila egiaztatzen duen titulu edo ziurtagiri bat izatea (Nafarroako Administrazio Publikoaren Institutuko zuzendari kudeatzaileak irailaren 13an emandako 210/2010 Ebazpenean aipatzen diren titulu edo ziurtagirietako bat –2010eko 117. Nafarroako Aldizkari Ofiziala, irailaren 27koa–), edo ofizialki baliokidetzat jotako beste titulu bat, edo, bestela, izangaiek behar den hizkuntza maila duela frogatzeko berariaz deituko den proba gaintzea.

2.3. Baldintza horiek eskaerak aurkezteko epea bukatzen den egunean bete beharko dira, lanpostuaren jabetza hartu arte.

Gidabaimenari dagokion baldintzari ez zaio aurreko paragrafoan ezarritakoa aplikatuko, izan ere, preskakuntza ikastaroan onartutako izangaien behin-behineko zerrenda argitaratzen den egunean bete beharko da baldintza hori; berdin jokatuko da euskara mailari dagokionez, deialdi honen 6.5 atalean xedatu bezala jokatuko baita.

2.4. Baldintza horiek deialdi honen oinarrietan ezartzen den unean frogatu beharko dituzte izangaiek.

### **3.–Eskaerak, tasak eta dokumentazioa.**

#### **3.1. Eskaerak aurkezteko epea.**

Deialdian parte hartzeko eskaerak hogeita hamar egun naturaleko epean aurkeztuko dira, hura Nafarroako Aldizkari Ofizialean argitaratu eta biharamunetik kontatzen hasita. Eskaerak aurkezteko epea luzaezina da.

#### **3.2. Eskaera aurkeztea eta formalizatzea.**

Hautapen prozesu honetan parte hartu nahi dutenek telematika bidez aurkeztu beharko dute eskaera, Internet bidez, [www.nafarroa.eus](http://www.nafarroa.eus) helbidean, nabigazio bide honi jarraituz: “Enplegua”, “Lan eskaintzak”, “Enplegu publikoa Foru Administrazioan”, “Enplegu finkorako eta aldi baterako enplegurako deialdiak”, deialdi honen aipamenean sartuta.

Euskara maila berariazko proba bat gaudituz frogatu nahi duten izangaiek hala adierazi beharko dute deialdian parte hartzeko eskabidean, horretarako prestatutako tokian.

#### **3.3. Tasak.**

Azterketa eskubideengatik eta espediente formalizatzeko, 26 euroko tasa ordaindu beharko da.

Tasa ordaintzetik salbuetsita daude deialdia argitaratzen den egunerako lan eskatzaile gisa hilabete bat edo gehiago inskribaturik daramaten pertsonak. Salbuespen hori aplikatzeko baldintza izanen da inskribaturik egon diren bitartean eskainitako inolako lan egokiri uko egin ez izana eta lanbide sustapen, prestakuntza edo aldaketarako ekintzetan parte hartzeari uko egin ez izana, justifikaturiko kasuetan izan ezik, eta, horrez gainera, lanbide arteko gutxieneko soldatetik goitiko diru-sarrerarik ez izatea hilabetero.

Aurreko paragrafoan aurreikusitako salbuespena honela frogatu beharko da:

–Lan eskatzailea dela frogatzeko, behar den enplegu bulegoak emandako agiria aurkeztu beharko da. Bertan, lan eskatzaile gisa inskribatu zeneko data agertuko da, eta, orobat, adieraziko da inskribaturik egon den bitartean ez diola uko egin handik eskainitako inolako lan egokiri, ezta lanbide sustapen, prestakuntza edo moldaketarako ekintzetan parte hartzeari ere, justifikatutako kasuetan izan ezik.

–Interesdunaren erantzukizunpeko adierazpenaren bidez frogatuko da ez duela hilero lanbide arteko gutxieneko soldatetik gorako diru-sarrerarik. Deialdian horretarako ezarritako eredia aurkeztuta eginen da hori, edo deialdian parte hartzeko eskabidean horretarako ezarritako tokian azalduta.

Telematikoki ordainduko da tasa, eskaera formalizatzean, ordainketa telematikoa egiteko sistema seguru baten bidez.

Azterketa eskubideen tasa ordaintzen ez bada, izangaia baztertu eginen da.

Azterketa eskubideen tasa ordaintzeak ez du inola ere ordeztuko eskaera behar den epean eta moduan aurkeztu beharra.

#### **3.4. Aurkeztu beharreko dokumentazioa.**

On line eskaera aurkezten denean, tasa ordaintzetik salbuetsita daudenek enplegu bulegoak luzatutako ziurtagiria aurkeztu beharko dute, baita errentarik ez izateari buruzko erantzukizunpeko adierazpena ere (biak ala biak aurreko atalean aipatutako agiriak). Errentei buruzko adierazpen hori aurkeztu beharko da, bakar-bakarrik, eskabidean behar den tokian adierazi ez den kasuetan.

Aski izanen da dokumentazioaren kopia soilak aurkeztea, baina aurkeztutako datuak edo agiriak ez-zuzenak edo faltsuak badira, behar diren erantzukizun penal, zibil edo administratiboak eskatuko dira.

### **4.–Izangaien onarpena.**

4.1. Eskaerak aurkezteko epea bukatutako, Funtzio Publikoko zuzendari nagusiak ebazpena emanen du izangai onartuen eta baztertuen behin-behineko zerrenda onesteko, eta Nafarroako Aldizkari Ofizialean argitara dadila aginduko du.

4.2. Behin-behineko zerrenda Nafarroako Aldizkari Ofizialean argitaratu eta biharamunetik hasita, izangai baztertuek hamar egun balioduneko epea izanen dute erreklamazioak aurkezteko eta, akatsik egin badute, haiek zuzentzeko. Erreklamazioak modu telematikoa aurkeztu beharko dira, Interneteko [www.nafarroa.eus](http://www.nafarroa.eus) helbidean, deialdiari buruz dagoen aiputik abiatuta.

4.3. Erreklamazioetarako epea bukatutakoan eta horiek ebatzita, Funtzio Publikoko zuzendari nagusiak onartu eta baztertuen behin betiko zerrenda onesten duen ebazpena emanen du, eta Nafarroako Aldizkari Ofizialean argitara dadila aginduko.

4.4. Izangaiei egotzitako arrazoiengatik baztertzen direnei ez zaizkie azterketa egiteko eskubideak itzuliko.

4.5. Onartuen zerrendan agertzeak ez dakar berekin aitortzen denik ezen zerrendan ageri direnek ebazpen honen bitartez iragartzen den prozeduran eskatutako baldintzak betetzen dituztela. Hautapen prozedura gainditu ondoren izangaiek aurkeztu beharreko dokumentazioa aztertzen denean egiaztatzen bada ez dutela baldintzaren bat betetzen, interesdunek prozedura honetan parte hartzeagatik izan ditzaketen eskubide guztiak galduko dituzte, deusetan galarazi gabe faltsukeria dela-eta legezkiekeen erantzukizun penal, zibil edo administratiboak.

### **5.–Kalifikazio epaimahaia.**

5.1. Hauexek izanen dira kalifikazio epaimahaiko kideak:

–Epaimahaiburua: Eduardo Sáinz de Murieta García de Galdeano jauna, komisario nagusia eta Ikerketa Kriminalaren Arloko burua.

Ordezkoa: Miguel Ángel Escudero Calvo jauna, Tuterako Foruzain Etxeko komisario burua.

–Epaimahaikidea: José Antonio Gurrea Martínez jauna, Bide Segurtasuneko Dibisioko komisario burua.

Ordezkoa: Eduardo Martín Vizcaíno jauna, Bide Segurtasuneko 3. Taldeko inspektoreorde burua.

–Epaimahaikidea: Pablo Cosín Baztán jauna, Informazio Dibisioko inspektore burua.

Ordezkoa: Ignacio María Azanza Beramendi jauna, bitarte baterako inspektorea, Polizia Judizialaren Iparraldeko Brigadako burua.

–Epaimahaikidea: José Luis Jiménez Vázquez jauna, Foruzainen Batzordea ordezkatuz.

Ordezkoa: Juan Manuel Zabalza Erviti jauna, Foruzainen Batzordea ordezkatuz.

–Epaimahaikide-idazkaria: José Antonio Goicoa Andrés jauna, Giza Baliabideen Taldeko inspektoreorde burua.

Ordezkoa: Yolanda Lumbreras Castellanos andrea, Kudeaketa Administratibo eta Ekonomikoaren Taldeko burua.

5.2. Hautaprobak egiten hasi aurretik eratuko da epaimahaia.

Epaimahaia ezin izanen da eratu, ezta jardun ere, kideen gehiengo osoa gutxienez bildu gabe.

Kide anitzeko organoaren eraketak eta jardunak balio izateko, epaimahaiburuak eta idazkariak edo haien ordezkoek bertan egon beharko dute.

Behin epaimahaia eratu denean, epaimahaiburua edo idazkaria gaixorik dagoenean edo haien aldi baterako absentsia justifikatuetan, Nafarroako Foru Komunitateko Administrazioari buruzko abenduaren 3ko 15/2004 Foru Legearen 31. eta 33. artikuluetan ezarritakoari jarraikiko zaio.

5.3. Kalifikazio epaimahaiko kideek parte hartzeari uko egin beharko diote, eta organo dei egileari horren berri eman, baldin eta Sektore Publikoaren Araubide Juridikoari buruzko urriaren 1eko 40/2015 Legearen 23. artikuluan abstentziorako aipatzen diren egoeretako batean badaude.

Izangaiek, halaber, zilegi dute epaimahaikideak errekusatzea, egoera horietako bat gertatzen denean.

5.4. Epaimahaiak gehiengoz ebatziko ditu deialdiko oinarrien interpretazio eta aplikazioaren inguruan sortzen diren arazoak.

5.5. Epaimahaiak aholkulari adituen laguntza izan dezake proba batzuetan nahiz guztietan. Aholkulari horiek beren espezialitate teknikoetan baizik ez dira arituko, eta haietan bakarrik emanen diote laguntza epaimahaiari.

### **6.–Oposizioa nola eginen den.**

6.1. Oposizioa 2018ko urritik aurrera hasiko da.

Onartu eta baztertuen behin betiko zerrenda onesten duen ebazpenean zehaztuko da oposizioko lehen proba non, noiz eta zer ordutan eginen den.

Oposizioaldiko proba bakoitza zuzendu ondoren, epaimahaiak jendaurrean jarriko du, Nafarroako Gobernuaren webgunean eta Nafarroako Gobernuaren iragarki oholean, gainditu duten izangaien zerrenda, lortutako kalifikazioekin, eta, halaber, hurrengo proba egiteko tokia, eguna eta ordua, gutxienez 48 ordu lehenago.

Oposizioaldiko proba bakoitzerako dei bakarra eginen da, eta izangaiek Nortasun Agiri Nazionala, pasaportea edo gidabaimena eraman beharko dute. Iragarritako egunetan, orduetan eta tokietan agertzen ez diren izangaiek edo aipatu diren agirien bidez identifikatzen ez direnak oposiziotik baztertuak izanen dira.

6.2. Oposizioko probak oinarri honetan zehaztutakoak izanen dira, eta deialdiko I. eranskinean zehazten den gai-zerrendako gaiei buruz eta ordena berean eginen dira.

Zein egunetan argitaratzen den deialdia Nafarroako Aldizkari Ofizialean, egun horretan indarra duen araudiaren arabera eskatuko dira gai guztiak.

6.3. Oposizioak bi fase izanen ditu. Lehenengoan, ezagutza probak, proba fisikoak eta psikoteknikoak eginen dira, eta bigarreanean, berriz, Nafarroako Segurtasun eta Larrialdi Eskolan eginen den oinarrizko prestakuntza ikastaro bat gainditu beharko da.

Nafarroako Poliziei buruzko martxoaren 23ko 8/2007 Foru Legearen 29.1 artikuluan xedatutakoa betetzeko, epaimahaiak modu kodifikatuan argitaratuko ditu izangaiak ariketetan lortzen dituzten puntuazioak.

6.4. Oposizioaren lehenengo fasea.

Lehenengo fasean proba hauek egin beharko dira:

6.4.1. Lehenengo proba:

Ariketa teorikoa izanen da; gehienez 100 galdera erantzun beharko dira, idatziz, deialdi honen I. eranskineko gai multzoetan agertzen diren gaiei buruz. Test moduko galderak izanen dira: bakoitzak lau erantzun alternatibo izanen ditu, baina bat bakarra izanen da egokia. Gehienez 2 ordu emanen dira ariketa hau egiteko. Erantzun oker bakoitzak penalizazioa ekarriko du, hain zuzen ere erantzun zuzenaren balioaren herena.

Lehenengo proba honetan, gehienez, 100 puntu lortzen ahalko dira, honela banatuak: zati orokorrari buruzko multzoan, gehienez 40 puntu; eta berariazko zatian, gehienez 60 puntu.

Kanporaturik geldituko dira gai multzo bakoitzari esleitutako puntuazioaren erdia gutxienez lortzen ez duten izangaiak.

Lehenengo probako galdera eta erantzunak I. eranskinean (gai zerrenda) agertzen den erreferentziako bibliografiaren arabera izanen dira.

6.4.2. Bigarren proba:

Deialdiaren II. eranskinean agertzen diren proba fisikoen ariketak egin beharko dira.

Bigarren proba egin baino lehen, eta oposizioko lehenengo proba gainditzen duten izangaien behin betiko zerrenda argitaratzen denean adieraziko den epean, bigarren proba egitera deitzen diren izangaiak ziurtagiri mediko ofizial bat aurkeztu beharko dute, esteka honetan lortzen ahal dena:

<https://colegiodemedicos.es/certificado-medico-oficial-donde-adquirirlo-quien-lo-rellena/>. Ziurtagiri hori berariaz izendatzen diren establezimenduetan ere lortzen ahalko da. Jarduneko mediku kideku batek sinatu beharko du, eta bertan, berariaz adierazi beharko du izangaiak behar den sasoia duela eta behar den osasun egoeran dagoela aipatutako proba fisikoak egiteko.

Ziurtagiria berariaz adieraziko den moduan aurkeztu beharko da, eta oposizioko epaimahaiko idazkariari zuzenduko zaio.

Ziurtagiri hori aurkezten ez dutenek bigarren probako ariketa guztiak egiteko eskubidea galduko dute, eta prozesutik baztertuta geldituko dira, ondorio guztietarako.

Epaimahaiak eskatuz gero, izangaiak behartuak daude dopinaren kontrako kontrola egitera, proba fisikoak egin bitartean edo beste egun batean. Kontrola ariketaren batean lortutako sailkapenari jarraikiz egin daiteke, edo ausaz aukeratzen direnei bakarrik. Horretarako deialdia idatziz eginen da, Kirolean Osasuna Babesteko Espainiako Agentziaren neurrien arabera ezarrita dagoen dopinaren kontrol ofizialetarako inprimakia erabiliz. Jardunbide debekatuak detektatzeko eta egiaztatzeko analisiak behar den organo espezializatuak eginen ditu. Izangaiak kontrol hori egiteari uko eginez gero edo trabak jarriz gero, edo adierazten zaion tokian eta orduan agertzen ez bada behar bezala justifikatu gabe, hautapen prozesutik baztertu eginen da berehalakoan. Baztertzeko arrazoi izanen da, orobat, dopin kontrola egiteko trabak jartzea, kasurik ez egitea, bidegabeki luzatzea eta gordeka ibiltzea, baita, egitez edo omisioz, kontrola egitea eragozten, nahasten, galarazten edo saihesten duten gainerako jokabideak ere, eta, betiere, izangaiak nahita ekiditen duenean, egitez edo omisioz, bildu beharreko laginak biltzea.

Horren ondorioetarako, debekatuta egonen dira Kiroletako Kontseilu Goreneko Lehendakariaren 2017ko abenduaren 22ko Ebazpenaren eranskinean heldu diren substantziak, gai farmakologikoak, dopin metodoak eta manipulazioak, ebazpen horren bidez onetsi baitzen kirolean debekatuta dauden substantzia eta metodoen zerrenda (2017ko 316. Estatuko Aldizkari Ofizialean, abenduaren 29koan, argitaratua).

Debekatuta dagoen edozein substantzia hautemanenez gero, ukitutako izangaia hautapen prozesutik baztertu da, deusetan galarazi gabe izangaiak kontra-analisia egin diezaiotela eskatzeko duen eskubidea, baita kalifikazio epaimahaiari bidezko alegazioak aurkezteko aukera ere.



Bigarren probako ariketak honela kalifikatuko dira:

–Pisua goratzeko proba (banku press-a), 5-10 puntu bitarte.

–Uretan aritzeko gaitasuna, 5-10 puntu bitarte.

–Zalutasun proba (Barrow testa), 5-10 puntu bitarte.

–Erresistentzia proba (Course Navette-ren testa), 5-10 puntu bitarte.

–Indar, erresistentzia eta koordinazio proba (alboko jauzien testa), 5-10 puntu bitarte.

Epaimahaiak ezarriko du proba fisikoak egiteko hurrenkera.

Proba guzti-guztietan gutxienez eskatzen den puntuazioa eskuratzen ez duten izangaiak bazterturik geldituko dira.

6.4.3. Hirugarren proba:

Proba psikotekniko batzuk eginen dira izangaiak lanpostuaren soslai profesiografikoaren eskakizunei noraino egokitzen zaizkien neurtzeko.

Nafarroako Administrazio Publikoaren Institutuak prestatuko du proba hori. Proba egitean diskrezioz jokatu da, halako moduan non bermatu beharko baita ebaluazio taldeak ez duela jakinen zein izangairi dagozkion aurreko proben emaitzak. Balorazio horiek lotesleak izanen dira epaimahaiarentzat.

Proba honetan, “Gai” edo “Ez gai” kalifikazioak emanen dira. Baztertu eginen dira “Gai” kalifikazioa lortzen ez duten izangaiak.

6.5. Euskararen ezagutza frogatzea.

Aurreko probaren kalifikazioak argitaratu ondoren, izangaiek euskararen ezagutza frogatzen ahalko dute, lanpostu elebidunetan sartzeko, deialdi honen 2.2 eta 2.3 ataletan ezarritakoarekin bat.

Epaimahaiak 10 egun balioduneko epea irekiko du izangaiek frogatzea dezaten, ezarriko den bidea erabiliz, deialdiaren 2.2 oinarrian adierazitako titulu edo ziurtagirietakoren bat dutela.

Gainera, izangaien batek eskatu badu euskara maila neurtzeko proba egin nahi duela, edo aurreko paragrafoan ezarritako epean baten batek frogatzen ez badu eskatzen den hizkuntza maila duela, epaimahaiak Euskararen Nafar Institutua-Euskarabide erakunde autonomoari laguntza eskatuko dio, hizkuntza maila neurtzeko berriazko proba bat egin dezan, eta proba hori gainditzen dutenei “Gai” edo “Ez gai” kalifikazioa emanen zaie B2 edo C1 mailarako, kasua zein den.

Horretarako, epaimahaiak euskara probara deitutako izangaien zerrenda argitaratuko du, proba egiteko lekua, eguna eta ordua adierazita, deialdiaren 13. oinarrian ezarritakoarekin bat.

Euskara probaren kalifikazioa bukatutik, emaitzak aurreko paragrafoan ezarritako modu berean argitaratuko dira.

## **7.–Oposizioaldiaren lehenengo fasearen emaitzak.**

7.1. Oposizioaldiaren lehenengo faseko probak bukatutik, epaimahaiak lehenengo fasea gainditu duten izangaien zerrenda argitaratuko du, lortutako puntuazioaren arabera, hautapen proba bakoitzean lortutako puntuazioa batuz. Horrekin batera, eskatutako euskara maila egiaztatu duten izangaiak adieraziko ditu.

7.2. Berdinketarik gertatuz gero, lehenengo proban puntu gehien lortzen dutenen alde joko da, eta, berdinketak badirau, bigarren proban lortutako puntuak hartuko dira aintzat.

Arestian ezarritako irizpideak aplikatuta ere berdinketak jarraitzen badu, epaimahaiak berriaz deituko duen jendaurreko ekitaldi batean eginen den zozketa bakar baten bidez ebatziko da. Berdindutako izangai guztien artean, bat ausaz hautatuko da. Berdinketa guztiak hurrenkera alfabetikoari jarraikiz desegingo dira, abiapuntu hartutik zozketa horretan hautatzen den izangaiaren abizenak eta izena.

## **8.–Gaitasun psiko-fisikoaren azterketa.**

Oposizioaldiaren lehenengo fasea gainditzen duten izangaiek gaitasun psiko-fisikoaren azterketa bat gainditu beharko dute, deialdiaren 2.1.d) oinarrian ezarritako baldintza betetzen dutela frogatzeko. Gainditzen duten izangaien kopurua eta lanpostu hutsen kopurua ikusita, epaimahaiak murrizten ahalko du proba hori egin behar dutenen kopurua.

Horretarako, oposizioaldiko lehenengo fasearen behin betiko emaitzak argitaratzearekin, epaimahaiak behar diren izangaiei deituko die, deialdiaren 13. oinarrian ezarritakoarekin bat.

Nafarroako Osasun Publikoaren eta Lan Osasunaren Institutuak egingen du osasun azterketa hori, deialdiaren III. eranskineko bazterbide medikoen taula kontuan hartuz, eta hartan, izangaiak “gai” edo “ez gai” deklaratu dira.

Gaitasun psiko-fisikoaren azterketaren emaitzak ikusita, epaimahaiak hautapen prozesuko bajak zehaztuko ditu.

### **9.–Lanpostu hutsak aukeratzea.**

9.1. Lanpostu hutsak hautatzeko ekitaldia prestakuntza ikastaroa hasi baino lehen egingen da.

9.2. Barneko Zuzendaritza Nagusiak lanpostu hutsak aukeratzeko ekitaldiaren deialdia egingen du, honako hauek adierazita: aukeratu beharreko 17 lanpostu hutsen zerrenda, aukeratzeko epea, puntuazioaren araberako izangaien zerrenda (lanpostu hutsak hautatzeko lehentasun ordenari jarraituz) eta eskatzen den euskara maila egiaztatu dutenen izen-abizenak.

Informazio hori jendaurrean jarriko da deialdi honen 13. oinarrian ezarritakoari jarraikiz.

Ondoren, izangaiak jakinaraziko dute, horretarako ezarritako epearen barrenean, zer foruzain lanpostu huts nahiago duten.

### **10.–Oposizioaldiaren bigarren fasea. Oinarrizko prestakuntza ikastaroa.**

10.1. Behin lanpostu hutsak aukeratzeko tramitea bukatu, epaimahaiak oinarrizko prestakuntza ikastaroan onartu diren izangaien behin-behineko zerrenda argitaratu du. Onartutako izangaien kopurua ezin da izan deialdiko lanpostu hutsen kopurua baino handiagoa.

Horrekin batera, eta aldi berean, epaimahaiak Nafarroako Segurtasun eta Larrialdi Eskolari behar den komunikazioa igorriko dio oinarrizko prestakuntza ikastaroa hasteko eguna, ordua, tokia eta bestelako jarraibide batzuk zehaztu dituzan.

10.2. Oinarrizko prestakuntza ikastaroan parte hartzeko, izangaiak honako agiri hauek aurkeztu beharko dituzte, zehaztuko den modua erabiliz, prestakuntza ikastaroan onartutako behin-behineko izangaien zerrenda argitaratu eta biharamunetik hamar egun balioduneko epean:

–Nortasun agiri nazionalaren fotokopia, edo izangaiaren nazionalitatea eta nortasuna frogatzen dituen beste agiri baliozko baten.

–Deialdiko 2.1.c) oinarrian eskatzen diren tituluen fotokopia, edo titulua lortzeko eskubideak ordaindu dituela frogatzen duen gordekinarena edo, bidezkoa denean, eskabideak aurkezteko epean titulua eskuratzeko moduan dagoela frogatzen duen ziurtagiria.

–Zinpeko adierazpena edo promesa, Nafarroako foru araubidea errespetatuko duela, Konstituzioari eta legeei men egingen diela eta karguari dagozkion eginkizunak zuzen beteko dituela dioena.

–A2 eta B motako ibilgailuak gidatzeko baimenen aurreko aldearen eta atzeko aldearen kopia.

–Hala izanez gero, deialdiaren 12.2 atalean aipatzen den aukeraz baliatu dela adierazten duen agiria.

–Armak eramateko, eta, hala badagokio, erabiltzeko konpromisoa hartzeko erantzukizunpeko adierazpena.

–Nafarroako Foru Komunitateko Administrazioari baimena ematea datuak kontsulta dituzan Justizia Ministerioaren menpeko Zigortuen eta Auzi-iheslarien Erregistro Zentralean, frogatzeko deialdiaren 2.1.e) oinarrian ezarritako baldintza betetzen dela. Nafarroako Foru Komunitateko Administrazioari kontsulta egitea baimentzen ez dioten izangaiak baldintza hori betetzen dutela frogatzeko agiria aurkeztu beharko dute. Barne Zuzendaritza Nagusiak eskatuko dio, izangaiak baimena eman ondoan, Justizia Ministerioaren menpeko Zigortuen eta Auzi-iheslarien Erregistro Zentralari ziurtatu dezala izangaiak ez duela aurrekari penalik edo haiek balio gabetu direla. Ziurtagiri hori espediente pertsonalari erantsiko zaio.

Aski izanen da dokumentazioaren kopia soilak aurkeztea, baina aurkeztutako datuak edo agiriak ez-zuzenak edo faltsuak badira, behar diren erantzukizun penal, zibil edo administratiboak eskatuko dira.

10.3. Atal honetan eskatzen diren agiriak edozein behar den moduan ez aurkezteak eta horretarako ematen den epean akatsak ez zuzentzeak berekin ekarriko du izangai hori hautapen prozesutik baztertzea, deusetan galarazi gabe eskaera faltsutzeagatik legokiokeen erantzukizuna.

10.4. Oinarrizko prestakuntza ikastaroa egiteko deialdi bakarra egiten bada Administrazio Publiko batean baino gehiagotan egindako hautapen prozesuetarako, deialdi honen indarrez ikastarora behin-behineko onartzen diren izangaiak aukeratu beharko dute zein administrazio aukeratzuten duten oinarrizko prestakuntza ikastaroa egiteko. Aukera hori idatziz aurkeztu beharko da, 10. oinarriko 2. atalean adierazitako dokumentazioa



aurkeztearekin batera. Epe horretan aukeratzen ez badute, ulertuko da oinarritzko prestakuntza ikastaroan parte hartu nahi dutela Nafarroako Foru Komunitateko Administrazioak deitutako hautapen prozesuaren barruan.

10.5. Aurreko ataletan aurreikusitako kasuan, prozesua gainditu duten izangaien zerrendan hurrengoa den izangaiarekin beteko da baja, eta izangai horrekin oinarri honetan oinarritzko prestakuntza ikastaroan parte hartzeko adierazi bezala jokatu da.

10.6. Deialdi honen xede diren lanpostuetarako baldintzak eta betebeharrak frogatzeko agiriez gainera, Funtzio Publikoko Zuzendaritza Nagusiak besteren bat eskatu nahi izanez gero, proposatzen den izangaiari eskatu beharko dio, eta horrek deialdi honen 10.2 atalean ezarritako moduan aurkeztu beharko du.

10.7. Aurreko dokumentazio guztia aurkeztuta eta baldintza guztiak betetzen direla frogatuta, prestakuntza ikastaroan behin betiko onartutako izangaien zerrenda argitaratuko du epaimahaiak. Zerrendan sartzen diren izangaien kopurua ezin da izan deitutako lanpostuen kopurua baino handiagoa.

10.8. Prestakuntza ikastaroa Nafarroako Segurtasun eta Larrialdi Eskolak emanen du, baztergarria izanen da eta Nafarroako Segurtasun Eskolaren Antolamendu eta Funtzionamendurako Erregelamendua onesten duen irailaren 12ko 113/2005 Foru Dekretuan xedatutakoari jarraikiz garatuko da.

Prestakuntza ikastaroan parte hartzen duten izangaiak praktiketako funtzionario izendatuko dira, aurretik Nafarroako Foru Komunitateko Administrazioiko funtzionarioak direnak izan ezik.

Funtzio Publikoko Zuzendaritza Nagusiak praktiketako funtzionarioen izendapenak eginen ditu, Nafarroako Segurtasun eta Larrialdi Eskolari atxikiak.

Izangaiek erregelamenduz ezarritako ordainsariak jasoko dituzte eta Gizarte Segurantzaren Araubide Orokorrean afiliatuko eta, hala badagokio, alta emanen zaie, salbu eta lehendik Nafarroako Administrazio Publikoaren zerbitzuko Langileen eskubide pasiboen beste araubide batean afiliatuta zeudenen kasuan, bertan segituko baitute.

Ikastaroan baja emateak berekin ekarriko du oposizioan jarraitzeko eskubidea eta praktiketako funtzionarioaren izaera galtzea. Hori gertatuz gero, deialdia egin duen organoari jakinaraziko zaio berehala.

Martxoaren 23ko 8/2007 Foru Legearen 29.3 eta 43.4 artikuluetan ezarritakoarekin bat, izangairen batek deialdian eskatutako ikastaroaren antzeko bat, Nafarroako Segurtasun eta Larrialdi Eskolak antolatua, gainditu badu, aski izanen da Nafarroako Segurtasun eta Larrialdi Eskolak ikastaro hori baliozkotzea. Hori frogatzeko, egiaztagiri ofiziala aurkeztuko da, ikastaroetako edukien berdintasuna edo baliozkotasuna frogatzen duena, eta baliozkotutako ikastaroan edo ikastaroetan lortutako kalifikazioak. Egiaztagiri hori Nafarroako Segurtasun eta Larrialdi Eskolak luzatuko du, interesdunak eskatuta. Nafarroako Segurtasun eta Larrialdi Eskolari dagokio, orobat, beste ikastaro eta diploma batzuk osorik edo partez baliozkotzea, antzeko eginkizunak dituzten organismo publikoek eman dituztenean, edo Eskolak berak lehenago emanak direnean, betiere edukiak baliokideak badira. Halakoetan, kalifikazioa ere emanen du, hala badagokio.

Prestakuntza ikastaroaren kalifikazioa “gai” edo “ez gai” izanen da.

Prestakuntza ikastaroan Nafarroako Segurtasun eta Larrialdi Eskolak izangaiei ematen dizkien kalifikazioak lotesleak izanen dira epaimahaiarentzat.

Prestakuntza ikastaroa gainditzen duten izangaiek, hautapen prozesuan gaitasun psikofisikoa galtzeagatik baja ematen ez bazaie, praktiketako funtzionarioak izaten segituko dute lanpostuaz jabetu arte.

Oinarritzko prestakuntza ikastaroan onartuak izan baino lehen egindako osasun azterketaz gain, ikastaroa egin bitartean edo hura bukatutakoan, izangaiek agintzen zaizkien osasun proba guztiak pasatu beharko dituzte, deialdiaren 2.1.d) atalean aipatzen den baldintza betetzen segitzen dutela frogatzeko. Proba horien bidez egiaztatzen bada baztertzeko arrazoirik badela, epaimahaiak aginduko du izangai horiei baja ematea hautapen prozesuan, eta, ondorioz, praktiketako funtzionario izaera galduko dute.

### **11.–Probak gainditu dituztenen zerrenda eta izendapen proposamena.**

Epaimahaiak, izangaiek prestakuntza ikastaroan erdietsitako kalifikazioak jaso ondotik, espedientean bilduko ditu, ikastaroa gainditu dutenen zerrenda onetsiko du (oposizioaldian ateratako guztirako puntuazioaren arabera) eta Funtzio Publikoko zuzendari nagusiari izendapen proposamena igorriko dio. Proposamen hori Nafarroako Aldizkari Ofizialean argitaratuko da, baita deialdiari buruz egiten den aipamenean ere, 13. oinarrian aurreikusitakoarekin bat.

### **12.–Izendapena eta jabetza hartzea.**

12.1. Funtzio Publikoko zuzendari nagusiak, ebazpen baten bitartez, Nafarroako Foru Komunitatearen Administrazioiko funtzionario izendatuko ditu aurreko oinarrietan ezarritakoa betetzen duten izangaiak, foruzainen lanpostuetan aritzeko. Ebazpen horren bidez lanpostuen esleipena ere eginen da.

12.2. Izendapenak eta lanpostuaren jabetza hartzeak nomina eta plantillako funtzionario bilakatuko ditu izendatuak, indarra duten xedapenek ezartzen dituzten eskubide eta betebeharrak guztiak dituztela. Gizarte Segurantzako araubide orokorrean afiliatu eta alta emanen zaie, araubide horretan ezarritakoaren babesean.

Aurrekoa gorabehera, Nafarroako Administrazio Publikoen zerbitzuko Langileen Estatutua onetsi zuen abuztuaren 30eko 251/1993 Legegintzako Foru Dekretuaren bederatzigarren xedapen gehigarriaren 3. puntuan xedatutakoa aplikatzearen ondorioz, Nafarroako Administrazio Publikoen edozein monte-pioaren eskubide pasibo-etan sarturik daudenek bi aukera izanen dituzte: Nafarroako Foru Komunitateko Administrazioaren Monte-pioan segitzea, martxoaren 5eko 10/2003 Foru Legearen bidezko eskubide pasiboaren araubideak babesturik, edo Gizarte Segurantzako araubide orokorrean sartzea.

12.3. Izendapena Nafarroako Aldizkari Ofizialean argitaratuko da eta lanpostuaren jabetza hartzea izendapenaren ebazpenean adierazten den egunean izanen da.

Jabetza hartzearekin batera bukatutzat emanen da praktiketako funtzionarioaren izendapena.

Behar bezala arrazoitutako ezinbesteko kasuetan izan ezik, zehaztutako egunean lanpostuaren jabetza hartzen ez duten izangaiek Foru Komunitateko Administrazioaren funtzionario izateko eskubide guztiak galduko dituzte.

12.4. Euskaraz edo beste hizkuntza komunitarioren bat jakin beharra duten lanpostu elebidunetan sartzen direnek beste lanpostu huts batzuk betetzeko prozesuetan parte hartzen ahalko dute, bakar-bakarrik, baldin eta horietan aritzeko hizkuntza hori nahitaez jakin behar bada.

Aurreikuspen hori ez da aplikatuko baldin eta, jakin behar den hizkuntza kontuan hartu gabe, hautapen prozesuko emaitzak aukera ematen bazion interesdunari baldintza hori ez zuen lanpostu bat eskuratzeko.

### **13.–Jarduketaren publikitatea.**

Deusetan galarazi gabe Nafarroako Aldizkari Ofizialaren bidez modu ofizialean argitaratu beharreko tramiteak, ariketen deialdiei eta kalifikazioei buruz epaimahaiak ematen dituen ebazpenen eta haren jarduketaren gaineko informazioa, baita interesdunentzat jakingarri den informazio guztia ere, Nafarroako Gobernuaren Erregistro Orokorreko iragarki oholean argitaratuko da, baita deialdiaren fitxan ere, Nafarroako Gobernuaren webgunean: [www.nafarroa.eus](http://www.nafarroa.eus), “Enplegua”, “Lan eskaintzak”, “Enplegu publikoa Foru Administrazioan”, “Enplegu finkorako eta aldi baterako enplegurako deialdiak” aukeratuta.

### **14.–Errekurtsoak.**

Kalifikazio epaimahaiak ematen dituen egintzen eta ebazpenen kontra, gora jotzeko errekurtoa aurkezten ahalko da, Funtzio Publikoko zuzendari nagusiari zuzendua, hilabeteko epean, errekurtoaren xede den egintza argitaratu edo jakinarazi eta biharamunetik hasita.

Deialdiaren, oinarrien eta haiek aplikatzeko egintzen kontra, kalifikazio epaimahaiak hartutakoaren kontra izan ezik, zilegi izanen da gora jotzeko errekurtoa jartzea, Lehendakarietzako, Funtzio Publikoko, Barneko eta Justiziako kontseilariari zuzendua, hilabeteko epean, errekurritu nahi den egintza argitaratu edo jakinarazi eta biharamunetik hasita.

Hori guztia Nafarroako Foru Komunitateko Administrazioari buruzko abenduaren 3ko 15/2004 Foru Legearen 57. artikularekin bat eta Administrazio Publikoen Administrazio Prozedura Erkideari buruzko urriaren 1eko 39/2015 Legearen 121. eta 122. artikuluei jarraikiz.

Iruñean, 2018ko apirilaren 23an.–Funtzio Publikoko zuzendari nagusia, Amaia Goñi Lacabe.

## I. ERANSKINA

*Gai zerrenda*

*Zati orokorra*

### **Giza zientziak.**

1.–Polizia-deontologia: definizio orokorrak; aplikatzeko araudia; polizia-deontologia eta Giza Eskubideak Nafarroako Foruzaingoa.

2.–Toxikomaniak eta alkoholismoa. Tabakoa, alkohola eta legez kontrako drogak Espainian: horiek pertsonengan dituzten ondorioak. Drogak kontsumitzeagatiko eta/edo horiekin trafikatzegatiko delituak Espainian, eta izan daitezkeen zehapenei buruzko informazioa.

3.–Familia nafarren egoera soziodemografikoa. Migrazioak: beharrak eta berriazko potentzialitateak, iraganerako eta etorkizunerako begirada, zergatiak, jatorrizko herrietan eta destinakoetan duten inpaktua. Nafarroan krisi ekonomikoak izan duen inpaktua eta desberdintasuna handitzea.

4.–Gizarte larrialdietako baliabideak Nafarroan. 15/2006 Foru Legea, abenduaren 14koa, Gizarte Zerbitzuei buruzkoa: Atariko titulua. Xedapen orokorrak (1-5 artikulua).

5.–Gizarte zerbitzu orokorren zorroa Nafarroan: larrialdietarako telefono zerbitzua. Aldi baterako egonaldien zerbitzua gaixotasun mentala duten pertsonentzat. Etxegabeentzako abegi zerbitzua. Adingabeentzako behaketa eta abegi zerbitzua. Genero indarkeriaren biktimei arreta emateko zerbitzua.

6.–Delitugilea: delituen tipologia. Delitugile arrunta. Delitugile bortitza. Delitugile sexuala. Delitugile gazteak. Adingabearen erantzukizun penala. Ziberdelinkuentzia.

7.–Biktima: sarrera eta esparru kontzeptuala. Biktimizazio motak. Delituak biktimarengan dituen ondorioak. Biktima motak. Beldurra eta delitua. Polizia eta biktima.

8.–Genero-berdintasuna: 33/2002 Foru Legea, azaroaren 28koa, Nafarroako emakumeen eta gizonen aukera berdintasuna sustatzekoa.

9.–14/2015 Foru Legea, apirilaren 10ekoa, Emakumeen kontrako Indarkeriari aurre egitekoa. I. titulua. Xedapen orokorrak. V. titulua. Arretarako eta oneratzeko baliabideak eta zerbitzuak. VII. titulua. Poliziaren arreta eta babes eraginkorra. VIII. titulua. Laguntza juridikoa eta justiziara jotzea: I. kapitulua. Laguntza juridiko espezializatua.

10.–Trebetasun sozialak eta komunikazio teknikak.

11.–Oinarrizko ortografia.

### **Nafarroako lurraldearen ezagutza.**

1.–Navarra-Geografia.

Nafarroako atlasa, 2017.

Turismoa: sarrera. Nafarroan barnako ibilbideak. Donejakue Bidea. Kultura ibilbideak. Intereseko informazioa (interes orokorreko mapa turistikoa). 122.etik 167. orrialdera (bi horiek barne).

Ingurumena: ingurumen aldetik interesa duten lekuak. 172.etik 188. orrialdera (bi horiek barne).

2.–Nafarroako Foru Komunitateko errepideen katalogoa, 2016: autobideak, autobiak, bide bikoiztuak, prestazio handiko errepideak, interes orokorreko errepideak eta Foru Komunitatearen intereseko errepideak.

*Zati berezia*

### **Legeria.**

1.–Zuzenbidearen iturriak: legea, ohitura eta zuzenbidearen printzipio orokorrak. Jurisprudentzia. Arau-hierarkia. Europako Batasunaren zuzenbidearen eragina iturrien sisteman. Arau juridikoen interpretazioa. Foru legeak egiteko prozedura. Botere betearazlearen ahala erregelamenduak egiteko Nafarroako Foru Komunitatean.

2.–Espainiako 1978ko Konstituzioa: Hitzaurrea. Atariko titulua (1-9 artikulua). I. titulua. Oinarrizko esku-bideak eta betebeharrak (10-55 artikulua).

3.–Nafarroako Foru Eraentza Berrezarri eta Hobetzeari buruzko abuztuaren 10eko 13/1982 Lege Organikoa: Atariko titulua. Nafarroako Foru Komunitateko erakundeak. Nafarroako Foru Komunitatearen ahalmenak eta eskumenak.

4.–Europar Batasuna: erreferentzia historikoa. Europar Batasunaren funtzionamendua eta erakundeak: Parlamentua, Europako Kontseilua, Europako Batzordea, Europar Batasuneko Justizia Auzitegia. Askatasunaren, segurtasunaren eta justiziaren espazioa Lisboako Tratatuaren ondoren.

5.–Abuztuaren 30eko 251/1993 Legegintzako Foru Dekretua, Nafarroako Administrazio Publikoen zerbitzuko Langileen Estatutuaren testu bategina onesten duena. I. titulua. Xedapen orokorrak (1-4 artikulua). II. titulua. Funtzionario publikoak: I. kapitulua. Hautapena (5-8 artikulua). II. kapitulua. Funtzionario izaera eskuratzea eta galtzea (9-11 artikulua). III. kapitulua. Mailak eta graduak (12-13 artikulua). IV. kapitulua. Administrazio karrera (14-18 artikulua). VI. kapitulua. Administrazio egoerak (22-30 artikulua). Bateriaezintasunen araubidea (57. artikulua).

6.–15/2004 Foru Legea, abenduaren 3koa, Nafarroako Administrazioari buruzkoa: I. titulua. Printzipio orokorrak (1-4 artikulua). II. titulua. Herritarren eskubideak Foru Komunitateko Administrazioarekiko harremanetan (5-15 artikulua). III. titulua. Nafarroako Foru Komunitateko Administrazioaren antolaketa. I. kapitulua. Printzipio orokorrak (16. artikulua). II. kapitulua. Nafarroako Foru Komunitateko Administrazioaren egitura organikoa (17-27 artikulua).

7.–39/2015 Legea, urriaren 1ekoa, Administrazio Publikoen Administrazio Prozedura Erkideari buruzkoa: administrazio errekurtsioak (112-126 artikulua). Administrazio errekurtsioak abenduaren 3ko 15/2004 Foru Legearen esparruan (56-60 artikulua).

8.–10/1995 Lege Organikoa, azaroaren 23koa, Zigor Kodeari buruzkoa: Atariko titulua. Zigor bermeak eta zigor legearen aplikazioa. I. liburua. I. titulua. Zigor arloko arau-hausteak. II. titulua. Delituen erantzukizun kriminala duten pertsonak. V. titulua. Delituen ondoriozko erantzukizun zibila eta prozesuko kostuak (I. eta II. kapituluak).

9.–1882ko irailaren 14ko Errege Dekretua, Prozedura Kriminalari buruzko Legea onesten duena: II. liburua. Sumarioa. I. titulua. Salaketa. III. titulua. Polizia Judiziala. IV. titulua. Zitazioa, atxiloketa eta behin-behineko espetxeratzea. II. kapitulua. Atxiloketa. IV. kapitulua. Defentsa eskubideaz baliatzea, abokatuaren laguntza, eta atxilotuei eta presoiei eman beharreko tratua. VIII. titulua. Konstituzioaren 18. artikuluan aitortutako eskubideak mugatzen dituzten ikerketa neurriak. I. kapitulua. Sarrera eta erregistroa toki itxietan. II. kapitulua. Liburu eta paperen erregistroa. III. kapitulua. Atxiloketa eta gutuneria idatzi eta telegrafikoa irekitzea. 6/1984 Lege Organikoa, maiatzaren 24koa, Habeas Corpus prozedura arautzen duena. Espainiako arlo juridikozional penala eta Nafarroako barruti judizialak.

10.–2/1986 Lege Organikoa, martxoaren 13koa, Segurtasun Indar eta Kidegoei buruzkoa. I. titulua. Segurtasun Indar eta Kidegoak. II. titulua. Estatuko Segurtasun Indar eta Kidegoak. III. titulua. Autonomia erkidegoetako polizia. IV. titulua. Estatuko Segurtasun Indar eta Kidegoen eta Autonomia Erkidegoetako Polizia Kidegoen arteko lankidetzak. V. titulua. Udaltzaingoak. Azken xedapenetako hirugarrena.

11.–8/2006 Foru Legea, ekainaren 20koa, Nafarroako Segurtasun Publikoari buruzkoa. I. kapitulua. Xedapen orokorrak (1-4 artikulua). II. kapitulua. Segurtasun sistemaren antolaketa (5-13 artikulua). IV. kapitulua. Segurtasun arloko plangintza (17-20 artikulua). V. kapitulua. Administrazio publikoen arteko harremanak (21-25 artikulua). VI. kapitulua. Herritarrekiko harremanak (26-28 artikulua).

12.–8/2007 Legea, martxoaren 23koa, Nafarroako Polizieiei buruzkoa. Atariko titulua. Xedea eta definizioak (1-2 artikulua). I. titulua. Nafarroako polizia (3-6 artikulua). II. titulua. Nafarroako Foruzaingoa (7-13 artikulua). III. titulua. Udaltzaingoak (17-24 artikulua).

13.–72/2016 Foru Dekretua, irailaren 21ekoa, Nafarroako Foruzaingoaren Antolamenduaren eta Funtzionamenduaren Erregelamendua onesten duena. I. titulua. Xedapen orokorrak (1-4 artikulua). II. titulua. Nafarroako Foruzaingoaren antolamendua (5-26 artikulua). III. titulua. Foruzaingoaren funtzionamendua (27-35 artikulua).

14.–57/2002 Foru Dekretua, martxoaren 25ekoa, Nafarroako Foruzaingoko lanpostuak betetzeko Erregelamendua onesten duena. I. kapitulua. Xedapen orokorrak (1-9 artikulua). II. kapitulua. Lanpostuak betetzea lehiaketaren, berariazko lehiaketaren edo izendapen librearen bidez (10-23 artikulua). III. kapitulua. Lanpostuak betetzeko beste modu batzuk (24-28 artikulua). Foru Dekretuaren lehen xedapen gehigarria.

15.–4/2015 Lege Organikoa, martxoaren 30ekoa, herritarren segurtasuna babesteari buruzkoa. Hitzaurrea. I. kapitulua. II. kapitulua. III. kapitulua. V. kapitulua (30. artikulutik 37.era, 47. artikulutik 49.era, eta 52. artikulua, denak barne). Seigarren xedapen gehigarria. Azken xedapenetako hirugarrena.

### ***Ezagupen teknikoak.***

1.–Oinarrizko informatika: ordenagailu baten osagaiak.

2.–Windows 7 sistema eragilea: oinarrizko funtzioak; Windows arakatzaila; mahaigaina; kontrol-panela; osagarriak; zakarrontzia.

3.–Microsoft Word 2010 testu prozesadorea: oinarrizko funtzioak.

4.–Interneta, nabigatzaileak, Intraneta eta posta elektronikoa.

5.–Sare sozialen oinarrizko ezagupenak: Twitterra, Instagrama, Facebooka, WhatsAppa.

Oharra:

Lehenengo probako galderak eta erantzunak bat etorriko dira gai horiekin eta dagokien bibliografiarekin, zeina [www.nafarroa.eus](http://www.nafarroa.eus) webgunean argitaratuko baita.

## II. ERANSKINA

### *Bigarren probari dagozkion ariketak*

#### **1.–Bankako press-a, edo pisua jasotzeko proba, 38 kg gizonentzat eta 20 kg emakumeentzat.**

Azalpena: banku batean etzanda, ahoz gora, eta oinak euste-zoruan dituela, izangaiak pisu bat goratu beharko du 60 segundoan ahal duen aldi guztietan. Pisua 38 kilokoa izanen da gizonezkoentzat, eta 20 kilokoa emakumeentzat. Bi eskuekin goratuko du pisua, eta barra hartuko du sorbalden zabalera baino pixka bat zabalago (barrari ahurraz helduta eta behatzak itxita). Ariketa honela egingen da: hasieran barrak bularra ukitzen du, ukondoak flexionaturik, eta gero ukondoak erabat luzatzen dira bertikalean jarri arte. Izangaiak saio bakarra izanen dute proba egiteko. Ezin da eskularrurik erabili, ez heltzea errazten duen beste edozein substantzia, ezta jantzia kendu ere bizkarra bankuan zuzenean bermatzeko.

Ariketaren hasieran ukondoak flexionatuak egonen dira eta barrak bularra ukituko du. Ariketak irauten duen denbora guzti-guztian oinak lurzorua ukitzen egon beharko dira.

Ukondoak erabat luzatu ezean edo ukondoan flexio bakoitzean barrarekin bularra ukitu ezean, jasoaldia baliogabetuko da, eta, beraz, ez da kontatuko.

Kasu hauetan, ariketa bukatutzat emanen da:

–Oin batek edo biek lurzorua ukitzeari uzten badiote.

–Izangaiak ukondoak flexionaturik dituela, ariketa gelditzen badu barra bularrean bermatuz.

Puntuazioa: egindako errepikapenen arabera izanen da, eskala honi jarraikiz:

ERREPIKAPENAK		NOTA
Gizonezkoak	Emakumeak	
30 baino gutxiago	25 baino gutxiago	Baztertua
30 eta 35 artean	25 eta 29 artean	5
36 eta 41 artean	30 eta 34 artean	5,5
42 eta 46 artean	35 eta 39 artean	6
47 eta 50 artean	40 eta 43 artean	6,5
51 eta 54 artean	44 eta 47 artean	7
55 eta 57 artean	48 eta 50 artean	7,5
58 eta 60 artean	51 eta 53 artean	8
61 eta 62 artean	54 eta 56 artean	8,5
63 eta 64 artean	57 eta 58 artean	9
65	59	9,5
66 edo gehiago	60 edo gehiago	10

#### **2.–Ur inguruneke trebetasun proba (50 metro estilo librean, tarteka urpean).**

Azalpena: 25 metroko igerileku batean estilo librean igeri egitea, joan eta etorri.

Ezin izanen da erabili urpean igeri egiteko betaurrekorik, ez urpean igeri egiteko beste baliabiderik ere, baina bai igeri egiteko betaurrekoak.

Gauzatzeko modua: ateratzeko seinalea entzun ondoan, izangaia uretan murgildu eta 50 metro igerian egingen ditu, hasieran ur azalean eta gero urpean, ahalik eta denbora laburrenean. Lehenbizi igeri egingen du, eta, gero, irteeratik 10 metrora, urpean egingen du igeri bi metro, gelditu gabe, horretarako mugatuko den zonaren azpitik, gorputza ur azalaren azpian duela, eta gero beste aldeko hormaraino segituko du igeri egiten, han buelta eman eta irteerara itzuliko da. Mugatutako zonara iristean berriz ere urpean egingen ditu bi metro etengabe, eta hormaraino segituko du gero.

Saio bakarra egingen da.



Saioa baliogabetzat joko da, eta izangaia baztertuko da, baldin eta izangaia:

- Kortxo-ilarak edo igerilekuko alboko kaleak euskarri moduan edo bulkada hartzeko erabiltzen baditu.
- Igerilekuko ertzei heltzen badie atsedean hartzeko.
- Igerilekuaren hondoan bermatzen bada edo hura erabiliz bulkada hartzen badu.
- Kalez aldatzen bada.
- Noranzkoa aldatzean horma ukitzen ez badu.
- Baliorik gabeko bi ateraldi egiten baditu.

Puntuazioa: honako eskala honen arabera puntuatuko da (denbora segundotan neurtua, segundo-ehunenak ez baitira kontuan hartuko).


DENBORA		NOTA
Gizonezkoak	Emakumeak	
50" edo gehiago	55" edo gehiago	Baztertua
49",9tik 47"-ra	54",9tik 53"-ra	5
46",9tik 44"-ra	52",9tik 51"-ra	5,5
43",9tik 41"-ra	50",9tik 49"-ra	6
40",9tik 39"-ra	48",9tik 47"-ra	6,5
38",9tik 37"-ra	46",9tik 45"-ra	7
36",9tik 35"-ra	44",9tik 43"-ra	7,5
34",9tik 33"-ra	42",9tik 41"-ra	8
32",9tik 31"-ra	40",9tik 39"-ra	8,5
30",9tik 29"-ra	38",9tik 37"-ra	9
28",9tik 27"-ra	36",9tik 35"-ra	9,5
26",9 edo gutxiago	34",9 edo gutxiago	10

### 3.-Zalutasun proba (Barrow testa).

Abiatzeko jarrera: zutik, zutoinaren ondoan, eta irteera-marraren atzean.

Gauzatzeko modua: probaren helburua da "zortzi" itxurako ibilbide bat ahalik eta azkarren osatzea. Zirkuitua bost zutoinek mugatuko dute: horietatik lau erabiliko dira 8,66 x 5 metroko laukizuzen baten erpinak adierazteko, eta bosgarrena erdian kokatuko da (ikus grafikoa). Izangaiek bi aldiz osatu beharko dute zirkuitua, batean alde batera, eta bestean beste aldera (A eta B ibilbideak grafikoa). Ibilbide bakoitzean, bi saiakera egiten ahal dira. Bigarren saiakera eginen da, bakar-bakarrik, lehenengoa baliogabea izan baldin bada. Gutxienez minutu bateko atsedendia utziko da bigarren saiakera egin baino lehen.

Zirkuituaren eskema:



Proba hau egiteko gehieneko denbora hau da: 23"3 segundo gizonentzat, eta 26"5 segundo emakumeentzat.

Saiakera baliogabea izanen da izangaia honako hauetako bat egiten badu:

- a) Izangaia zutoin bat botatzen badu.
- b) Zutoin bat hartzen badu, eror ez dadin.

c) Izangaia ibilbidetik ateratzen bada, hau da, lasterketako marra idealetik ateratzen bada (nahiz eta ibilbide zuzenetik itzuli).

Puntuazioa: izangaiek bi ibilbideetan (A + B) emandako denbora batuko da, fotozelulak irakurri bezala, ehunenetan, kontuan hartuz ariketa bukatzen dela izangaia irteera marra berriz gurutzatzen duenean. Segundo-ehunenak alde batera utziko dira. Fotozelula sistemak huts egiten badu, erreserbako eskuzko kronometrajea aplikatuko da.

DENBORA		NOTA
Gizonezkoak	Emakumeak	
23"3 baino gehiago	26"5 baino gehiago	Baztertua
23"3tik 23"2ra bitarte	26"5etik 26"0ra bitarte	5
23"1etik 23"0ra bitarte	25"9tik 25"5era bitarte	5,5
22"9tik 22"8ra bitarte	25"4tik 25"0ra bitarte	6
22"7tik 22"6ra bitarte	24"9tik 24"6ra bitarte	6,5
22"5etik 22"4ra bitarte	24"5etik 24"2ra bitarte	7
22"3	24"1etik 23"9ra bitarte	7,5
22"2	23"8tik 23"6ra bitarte	8
22"1	23"5	8,5
22"0	23"4	9
21"9	23"3	9,5
21"8 edo gutxiago	23"2 edo gutxiago	10

#### 4.-Erresistentzia-proba (Course Navette-ren testa).

Gauzatzeko modua: izangaiek 20 metroko luzera duen joan-etorriko ibilbide bat egin behar dute zinta magnetofoniko batek emandako seinale akustikoen bidez markatutako erritmoari jarraikiz, ahalik eta joan-etorri gehien eginez. Izangaiek, zehazki seinalea entzutean, ibilbidearen bi muturrak seinalatzen dituzten marrak zapaldu beharko dituzte, edo marretatik haratago, txandaka. Buelta emanen da oin baten gainean bermatuta, marra zapalduz edo marretatik haratago. Zintak tarte erregularretan emanen du soinua. Probaren hasieran abiadura motela izanen da, baina gero eta azkarragoa eginen da. Izangaiek saio bakarra izanen dute proba egiteko.

Testaren helburua da zinta magnetofonikoak markatzen duen erritmoari eustea eskatzen diren epeak bete arte. Izangaia seinalea entzun baino lehentxeago abiatzen bada, behin baino gehiagotan, abisu bat emanen zaio. Izangaia seinalea baino lehen ateratzen bada eta metro bateko tartetik haratago joan bada, probari bukaera emanen zaio besterik gabe.

Honako egoera hauetan bukatuko da izangai bakoitzaren proba, eta ordura arte lortutako tarteak kontatutako dira:

–Izangaia gelditzea, salbu eta soilik une batez gelditzen bada 20 metroko marraren gainean pibotatzen ari denean, seinale akustikoaren zain.

–Izangaia bere kaletik ateratzea.

–Izangaia bi ibilbide bat bukatutzat ematea muturreko marra edo haratago zapaldu gabe.

–Seinale akustikoa entzuten denean, izangaia ez iristea 20 metroko marretatik metro bateko eremura.

–Izangaia hiru aldiz jarraian ez iristea muturreko marra zapaltzera, edo haratago, seinale akustikoak agintzen dionean. Seinaleak jotzen duen unean, marretatik metro bateko tartera egotea onartuko da. Segurtasun metroaren barruan egonda, izangaia ez badu marra zapaltzen seinale akustikoak jo baino lehen, izangaiari abisu bat emanen zaio, kontrolatzailearen ezker-eskuin jarriko den kono baten bidez. Abisu hori kendu eginen zaio baldin eta lortzen badu 20 metroko beste marra ukitzea seinale akustikoak jotzean. Marra ukitzen ez badu, bigarren abisua emanen zaio. Bi abisu dituela, izangaia 20 metroko beste marrara iristen bada seinale akustikoarekin batera, bi abisuak kenduko zaizkio; garaiz iristen ez bada, berriz, hirugarren abisua emanen zaio, eta proba bukatutzat hartuko da.

Puntuazioa: izangai bakoitzak proba bukatzen duen arte pasatako denbora-tarteen arabera izanen da (tarte bakoitza minutu batekoa da gutxi gorabehera), ondoko eskala honi jarraikiz:

TARTEAK		NOTA
Gizonezkoak	Emakumeak	
10,5 baino gutxiago	8 baino gutxiago	Baztertua
10,5	8	5
11	8,5	5,5
11,5	9	6
12	9,5	6,5
12,5	10	7
13	10,5	7,5
13,5	11	8
14	11,5	8,5
14,5	12	9
15	12,5	9,5
15,5 edo gehiago	13 edo gehiago	10

#### **5.–Indar-erresistentziaren eta koordinazioaren proba (alboko jauzien testa).**

Azalpena: lurretik 25 zentimetrora dagoen listoi baten gainetik jauzi egin beharko da, 30 segundoz etenik gabe, oinak elkarturik edo parez pare daudela. Zenbat jauzi egiten diren kontatuko da.

Abiatzeko jarrera: izangaia zutik jarriko da, listoiaren ondoan saiheska, bi oinak elkarturik edo pare-parean. Kontrolatzaileak “ya” esatean, jauzika hasiko da, gelditu gabe.

Bi saiakera egiten ahal dira. Bigarren saiakera egiten da, bakar-bakarrik, lehenengo baliogabea izan baldin bada. Gutxienez bi minutuko atsedenaldia utziko da bigarren saiakera egin baino lehen.

Saiakera baliogabea izanen da izangaiak honako hauetako bat egiten badu:

–Listoia botatzen badu.

–Jauzi bat errepikatzen badu listoiaren alde berean.

–Jauzien erritmoa eteten badu 30 segundoak bukatu baino lehen, eta gelditzen bada.

–Jauzi bat bukatuta listoia oinen artean gelditzen bazaio.

–Lurra bi oinekin batera ukitzen ez badu.

–Listoiak mugatutako eremutik kanpo egiten badu jauzi.

–Eskatutako gutxienezko jauzi kopurura iristen ez bada. Kasu horretan, izangaiak bigarren saiakera bat egiteko aukera izanen du.

Puntuazioa: egindako errepikapenen arabera izanen da, eskala honi jarraikiz:

ERREPIKAPENAK		NOTA
Gizonezkoak	Emakumeak	
55 baino gutxiago	35 baino gutxiago	Baztertua
55 eta 57 artean	35 eta 37 artean	5
58 eta 60 artean	38 eta 40 artean	5,5
61 eta 63 artean	41 eta 43 artean	6
64 eta 66 artean	44 eta 46 artean	6,5

ERREPIKAPENAK		NOTA
Gizonezkoak	Emakumeak	
67 eta 69 artean	47 eta 49 artean	7
70	50 eta 52 artean	7,5
71	53 eta 54 artean	8
72	55 eta 56 artean	8,5
73	57 eta 58 artean	9
74	59 eta 60 artean	9,5
75 edo gehiago	61 edo gehiago	10

### III. ERANSKINA

#### *Deialditik baztertzeko arrazoi medikoak*

##### **1.–Ikusmena. Begien sistema.**

–Zuzendu gabeko ikusmen zolitasuna:

- 4/10 bi begietan, edo
- 3/10 begirik okerreanean eta 5/10 hoberenean, edo
- 2/10 begirik okerreanean eta 6/10 hoberenean, edo

–Ikus-eremu monokularra: plano horizontalean, ez da 120°-tik beherakoa izanen, eta ez da murrizketa nabarmenik izanen ikus-eremuaren ezein meridianotan.

–Diplopia.

–Diskromatopsia larriak.

–Estereopsi falta.

–Keratotomia erradiala.

##### **2.–Entzumena. Entzuteko sistema.**

–500dik 3.000 Hz bitarteko frekuentzietan 45 dB-ko edo gehiagoko galera monoauraleko entzumen-zolitasuna.

–Orekari loturiko nahasmenduak, edozein etiologiatakoak.

##### **3.–Hizkera.**

–Afasiak, disfoniak, disfemiak (hitz toteltasuna), disartria eta diglosia iraunkorrak, polizia lanetan aritzea zaildu edo galarazten dutenak.

##### **4.–Giharren eta eskeletoaren aparatua.**

–Giltzaduraren baten ankilosia edo galera anatomikoa, ondorio funtzionalen arabera.

–Prozesu artikularrak, ondorio funtzionalen arabera, zeinahi etiologiaren ondorio direla ere.

–Eskoliosiak, 20° baino handiagoak.

–Zifosiak, 30° baino handiagoak.

–Espondilolisia, espondilolistesia, ornoen bategiteak eta ornoarteko diskoaren arazoak.

–Espondilitis ankilosantea.

–Paget-en eritasuna.

–Osteoporosia eta osteomalazia (ondorio funtzionalen arabera).

–Fibromialgia.

–Deformazio anatomikoak (ondorio funtzionalen arabera).

##### **5.–Digestio aparatua.**

–Crohn-en eritasuna eta kolitis ultzeraduna.

–B eta C hepatitis aktiboa izatea edo birusaren eramailea izatea.

–Gibeleko gutxiegitasuna, ebaluazio mahaiak baloratu beharrekoa.

–Gibeleko zirrosia.

–Behazun-zirrosi primarioa.

–Pankreatitis kronikoa.

–Fibrosi kistikoa.

–Abdomeneko paretaren herniak, ebaluazio mahaiak baloratu beharrekoa.

–Uzki-esfinterreko ihesa.

## **6.–Bihotz-hodietako sistema.**

–Bihotz-gutxiegitasuna, maila guztietan.

–Arritmiak eta blokeoak: aurre-eszitazioaren sindromeak eta erritmo edo kondukzio kardiakoaren edozein nahasmendu, honako hauek salbu: arritmia sinusala, edo estrasistole suprabentrikular edo estrasistole bentrrikular isolatuak, lehen mailako aurikula-bentrikuloaren blokeoa, eskuineko adarreko blokeo osoa eta ezkerreko adarreko hemiblokeoak.

–Kardiopatia iskemikoa, maila guztietan.

–Balbulopatiak.

–Miokardiopatiak.

–Perikardiopatia kronikoak.

–Biriketako hipertentsio primarioa eta sekundarioa.

–Arterietako iskemia kronikoaren sindromea.

–Arterietako hipertentsioa (TASa >140 eta TADa >90).

–Arterietako hipotentsioa (TASa < 90 eta TADa < 45).

–Zainen eta baso linfatikoen gutxiegitasuna.

## **7.–Arnas aparatua.**

–Arnas aparatua afekzio kronikoak (bronkitis kronikoa, buxadurazko arnas gaixotasun kronikoa, enfisema, bronkiektasiak).

–Pleurako isuri errepikariak.

–Berezko pneumotorax errepikaria.

–Eritasun interstizialak eta/edo biriketako fibrosia.

–Asma eta bronkioetako hipererreaktibotasuna.

## **8.–Nerbio-sistema.**

–Epilepsia.

–Esklerosi anizkoitza eta bestelako eritasun desmielinizanteak.

–Neurona motorraren eritasunak.

–Ataxiak.

–Buruko eta integrazioko funtzioen nahasmenduak (arrazoitze abstraktoa, oroimena, adimena eta funtzio betearazleak).

–Parkinson-en eritasuna eta bestelako nahasmendu estrapiramidalak.

–Odol-hodien afekzio iskemikoak, hemorragikoak edo malformazioen baten ondoriozkoak.

–Miastenia larria eta juntura neuromuskularraren bestelako arazoak.

–Bertigoak.

–Siringomielia.

–Hidrocefalia.

–Miopatiak.

–Nerbio-sistema zentralaren lesioaren ondoriozko paralisia.

–Paralisi periferikoak, ondorio funtzionalen arabera.

–Nerbio-sistema periferikoaren gaixotasunak, ondorio funtzionalen arabera.

–Neke kronikoaren sindromea.

–Anosmia.

–Mugimenduaren beste nahasmendu batzuk (tikak, mugimenaren estereotipiak, loaren nahasmenduak), ondorio funtzionalen arabera.

## **9.–Nahasmendu psikiatrikoak.**

–Nahasmendu mental organikoak, alde batera utzita prozesu automugatuak eta itzulgarriak.



–Substantzia psikotropikoen eta alkoholaren kontsumoaren ondoriozko nahasmendu mentalak eta portaeraren nahasmenduak.

–Eskizofrenia eta beste nahasmendu psikotiko batzuk.

–Gogo-aldartearen nahasmenduak (nahasmendu bipolarrak, nahasmendu depresibo errepikariak, depresio-aldi larria, nahasmendu distimikoak).

–Antsietate-nahasmenduak, ondorio kliniko nabarmengarria dutenak.

–Nortasunaren nahasmenduak eta bulkaden kontrolari loturikoak, gizarte eta lan bizitzan eragina dutenak.

#### **10.–Sexu eta gernu-aparatua.**

–Giltzurrun-gutxiegitasuna, bilakaeraren eta pronostikoaren arabera.

–Gernu-ihesa.

–Giltzurrun-polikistosisa.

#### **11.–Sistema endokrinologikoa.**

–Hipotalamo-hipofisario ardatzaren nahasmenduak.

–Hipertiroidismoa eta hipotiroidismoa, bilakaeraren eta pronostikoaren arabera.

–Addison, Cushing, feokromozitoma eta guriin suprarrenalen beste nahasmendu batzuk.

–Hipoaldosteronismo primarioa eta sekundarioa.

–Mellitus diabetesa.

–Adenomatosi endokrino anizkoitza.

–Hipoparatiroidismoa eta hiperparatiroidismoa, bilakaeraren eta pronostikoaren arabera.

#### **12.–Larrua, fanerak eta guriin exokrinoak.**

–Orbainak eta larruazalaren prozesu kronikoak, haien zabalera, ondorio funtzionalak eta kokapena direla-eta poliziaren eginkizunetan aritzeko gaitasuna gutxitzen dutenak.

#### **13.–Odola eta organo hematopoietikoa.**

–Aplasia medularra, gaueko hemoglobinuria paroxistikoa, sindrome mieloproliferatiboak, anemia hemolitiko kronikoak, b-talasemiak anemiarekin.

–Linfomak, bilakaeraren eta pronostikoaren arabera.

–Sindrome linfoproliferatibo kronikoak, bilakaeraren eta pronostikoaren arabera.

–Mieloma anizkoitzak eta Waldeström-en gaixotasuna.

–Hemofiliak eta hemostasiaren beste nahasmendu batzuk.

–Immunoeskasiak.

–Esplenektomia.

–Antikoagulatzaileak (Heparinak, Sintrom), Interferon, kortikoideak edo EPO erabiltzen dituzten tratamendu kronikoak.

#### **14.–Bestelakoak.**

–GIB birusaren antigorputzen eramailea.

–Amiloidosia.

–Kolagenosia.

–Lupus eritematoso sistemikoa.

–Artritis erreumatoidea.

–Esklerodermia.

–Sjögren-en sindromea.

- Baskulitisa, ebaluazio mahaiak baloratu beharrekoa.
- Obesitatea (GMI > 25).

### **15.–Azalpen orokorrak.**

–Patologia baztertzailak ebaluazio mahaiak baloratuko ditu ondorio funtzionalen arabera eta polizia lanetan aritzeari begira eginen den pronostikoaren arabera.

–Prozesu neoplasikoetan eta organoen transplanteen kasuetan, ebaluazio mahaiak gaitasuna baloratuko du, bilakaeraren eta pronostikoaren arabera.

–Edozein aparaturen eta sistemaren beste edozein afekzio, ebaluazio mahaiaren iritziz polizia lanetan aritzea galarazten ahal duen eragin funtzionala duena.